

13/05/2024

Aizawl

1830 Hrs

REGIONAL NEWS

HEADLINES:-

1. Vawk pul hri African Swine fever avangin kum hian state chungah vawk 684 an thi tawh.
2. Upper Assam-a Rel kawng chhia vanga Mizorama tuialhthei harsatna chuan ziaawm lam a pan chho zel.
3. Vawiin khan Lok Sabha inthlan thawh lina atan tluang taka vote thlak a ni
4. Central Board of Secondary Education (CBSE) chuan vawiin khan pawl 10 leh pawl 12 board exam result a tihchhuahah mipa aiin hmeichhia in an ti tha zawk.

<><><>

ASF

Vawk pul hri African Swine fever avangin kum hian state chungah vawk 684 an thi tawh ni a report a ni a, ASF vanga suat tawh zat chu 387 a tling a ni.

Tunlai khawlum chhovah ASF hri a leng chho leh a, ran damlo nei an awm anih chuan Animal Husbandry & Veterinary Dept phone no 1962 ah Doctor te biakrawn theih reng an ni tih AH & Vety Dept Deputy Director Dr.M. Zohmingthangi'n a sawi a ni.

Akashvani Correspondent in a kawmnaah Dr M Zohminthangi chuan kum 2021 atang kumtin khawlum intan tirhin ASF hi a rawn hluar chhuak leh thin a ni, a ti a. Thlasik laiin ASF chu zia deuh thin mahse nipui a lo inherchhuahin a hri chu a rawn pung leh thin a. Vaccine rintlak tak hmuhchhuah ala nih loh avangin mipuite chu fimkhur a pawimawh takzet a ni, a ti.

Animal Husbandry & Veterinary Dept in a chhinchhiah danin Vawiin khan African Swine Fever (ASF) vanga vawk thi zat chu 11 a ni a, vawk suat zat chu 56 a ni a. Heng vawk thi te hi Muallungthuah 4 Ramhlun Sports Complex-ah 1, Hualngohmunah 1, Dulteah 2 leh khumtungah 3 a ni.

ASF vanga vawk thi zat hi Kum 2021-22 khan vawk thi zat chu 33417 a ni a, kum 2022-23 khan 12795 a ni a, kum 2023-24 chungin 1139 niin tihian a vaiin ASF vanga vawk thi zat chu 47351 a ni tawh a. Vawk suat tawh zat hi Kum 2021-22 khan 12568, kum 2022-23 khan 11686, kum 2023-24 chungin 980 niin tihian a vaiin vawk suat zat chu 25234 a ni tawh a. Vawk thi avanga tanpuina dawng chungkua 2488 an awm tawh a. AH& Vety Dept chuan ASF vanga vawk chante tanpuina tur cheng nuai 311.66 an dil mek bawk.

<><><>

LADC

Thlahnih chung Lai Autonomous District Council ah Sorkar a kaltheihloh hnu ah naktuk chawhma dar 11:30 khian Lawngtlai LADC Hall ah United Legislature Party hruaitu, South Lungpher bialtu MDC, Pu C.Lalmuanthanga chu Lawngtlai DC, Pu Cheemala Siva Gopal Reddy chuan rinawmna thu tiamtirin Chief Executive Member atan a lalut dawn.

Puan tawh thin angin LADC ah Sorkar mumal a awm theihloh hnu ah Congress MDC pakhat leh MNF, MDC 12 ten United Legislature Party dinin, an hruaitu atan Congress Member Pu C.Lalmuanthanga an dah a, a ni hian Governor hnen

ah LADC ah a kaihhruai United Legislature Party in Sorkar an siam theih thu a thlen hnu ah Governor hian Pu C.Lalmuanthanga CEM atan a pawmna May 9, 2024 khan a tichhuak a, Pu C.Lalmuanthanga hi CEM atan lakluh a nih hnu ah Governor in ruahmanna a lo siamlawk tawh angin May 20, 2024 ah LADC Session ah CEM atan rintawkna a hmachhawn ang.

LADC ah Congress leh MNF ten Sorkar intawm United Legislature Party din an tum chungchangah Congress leh MNF hruaitute chuan LADC ah Sorkar a mumalloh chuan a tuartu chu mipui an nih vangin, mipui tawrhna thlengzel tur ngaingam lovin Sorkar intawm siam an tum tih an lo sawi tawh a ni.

<><><>

POL SITUATION

Upper Assam-a Rel kawng chhia vanga Mizorama tuialhthei harsatna chuan ziaawm lam a pan chhova, sorkarin tuialhthei pekchhuah a khuahkhirh a hlih hnuah zawi zawiin petrol leh diesel a lo thleng a, harsatna pawh sutkian zui nghal a ni.

Food, Civil Supplies & Consumer Affairs Department Director Pi Saizikpuii chuan tun dinhmunah Mizoram tuialhthei lakna Silchar-a IOCL depot ah tuialhthei a thlen that thu leh harsatna a awm zui a rin loh thu a sawi a ni.

Tuialhthei harsatna thleng denchhena dan lova man tova petrol leh diesel zuar chhawng te chu hrem theih an nih thu vawiin khan Aizawl District Magistrate chuan thuchhuah a siam a-Mi tumahin Aizawl District chungah Petrol leh Diesel hi phalna nei lovin an zuar tur a ni lo tih thuchhuahah chuan tarlangin he thupek hi kar hnih chung hman tur a ni.

<><><>

SUPPY DEPT NOTICE

Food Civil Supplies & Consumer Affairs Det chuan ration buhfai la ngailo te'n e-pos machine an hmeh loh avangin ration card block tumna sawrkar-in a nei lo tih vawiin khan thuchhuah a siam.

Tunlai hian 'ration buhfai khul ngailo ten e-pos machine hmeh vek tur a ni a, hmeh loh chuan ration card an block dawn' tiin thu thehdarh a awm ni a hriat a ni a, hei hi thu belhchian dawl lo a ni tih thuchhuah ah chuan sawiin, E-pos machine hmeh hi an ration an la ngei e tih finfiahna chauh a ni. Mipui ten an ration an la lo anih pawhin retailer-ten an tirirmai tur a ni lova, thla thara sem leh turin mipui tan an dah tur a ni a. Sawrkarin mipuite tan pawisa tam tak senga buhfai a lei chu e-pos machine kaltlang lova tihral mai chu dan bawhchhian a ni a, e-pos machine kaltlangin a dawngtu tur dik takte hnenah chauh sem tur a ni, a ti.

He thilah hian mipuite leh retailer zawng zawngte sawrkar tawiaawm tlat tur leh dan zawm tlat turin FCS&CA Department chuan a sawm tih a sawi bawk a ni.

<><><>

PROJECT WASTE FREE KOLASIB

Kolasib District Urban Development Office, Joint VC leh Sub Hqrs. YMA Kolasib tangkawp buatsaihin ‘Project Waste Free Kolasib, 2024’ thawhnhnihna atan Kolasib khawchhung a veng hrang hrangah bawlhhlawh thenfai hnatlang pui wawin khan neih a ni a. Venglai, College veng leh Project veng atanga hnatlang tur chhuakte chu Parkkawn ah inhmukhawm in Kolasib DC Pu John LT Sanga chuan a vailiam.

Pu John LT Sangachuan khawtlang fai leh hrisel siam tur chuan thawhona tha neih a pawimawh thu a sawi a, tui hnar te humhalh leh enkawl thianghlim a tul thu DC chuan sawiin hemi tur hian kan bawlhhlawh leh leivung paih dan ah fimkhur leh zual a pawimawh thu a sawi a. Kolasib district chu faina kawng a hma hruaitu ni turin Sawrkar, khawtlang leh tlawmngai pawlte inlungruak tak a hma la ho zel turin a sawm bawk a ni.

Hun kaihruaitu Pu Gilbert Lalhlimpuia, DUDO chuan tehfung hrang hrang hmanga khawpui fai inelna kalpui thin ah Kolasib chu a hnufual pawl an nih thin thu tarlangin October thla a Cleaniness Week chung a endikna neih leh tur ah chuan faina kawng ah hmasawna nasa zawk a awm ngei theih nan hma lak zel tum a nih thu a sawi.

Faina hnatlang pui neih mek ah hian Kolasib Town Area chung a Village Council hrang hrang ten khawtlang hnatlang kovin an mahni Area chung theuh ah hma an la a. Kawng kam, Tuihawk luan kawr te an thian fai a ni a. ‘Project Waste Free Kolasib, 2024’ hnuai ah hian DUDO leh CZS Higher Secondary School, Kolasib tangkawpin Tuichhuahen lui hnar a bawlhhlawh thian faina an lo neih tawh bawk a ni.

<><><>

NURSES DAY

International Nurses Day pualin wawin khan Aizawl Civil Hospital-a Nursing Staff Association te chuan Civil Hospital Conference Hall ah hun an hmang a.

Khawvel pum huapa nurse inzawmkhawm pawl lian ber, International Council of Nurses (ICN) ten kumin-a thupui an thlan, “Our Nurses. Our future. The economic power of care” tih hmangin hun hman a ni a, he hunah hian Deputy Director of Nursing Pi Mary Ramte-i Pachuau chuan Nurse te hlutna leh pawimawhna sawiin, damlo enkawl ngai, mahni inchung pawh ngaihtuah hman mang lova damlo buaipui tura an kal chhuah ngaih chang tam tak awm thin mahse damlo leh chhungtinte mamawh an nih avangin rim taka thawktu Nurse te chu mipui te tana rawngbawltu an nih zia chu sawi nawn ngai lo a nih thu a sawi.

Pi Mary Ramte-i chuan nikum khan Sorkarin Directorate of Nursing a hawn thu a sawi a, hetih rual hian hmachhawp tam tak hmalak tur a awm thu leh hma an lak mek thute, felfai zawka Directorate neia hmasawn turin a ngaih thu a sawi bawk.

May ni 12 hi, “Founder of Modern Nursing” – Florence Nightingale piancham a ni a. Khawvelpuma nurse te chuan “International Nurses Day” atan an hmang a.

Kum 1974 atang khan he ni hi Nurse te tana ni bika hman thin niin, kuminah hian Pathianni ah a tlak avangin District hrang hrangin an remchan danin hun an insiam a ni.

<><><>

4TH PHASE ELECTION

Vawiin khan Lok Sabha inthlan thawh lina atan tluang taka vote thlak a ni a. Zing dar 7 atanga tlai dar ruk thleng khan vote thlak a ni a. Hriat theih chinah tlai dar 5 thleng khan vote vote zaa 62 a tla tawh.

Inthlan thawhli naah hian state pakua leh Union Territory pakhata Lok Sabha seat 96 ah inthlan a ni a. Voter vaibelchhe 17.70 chuang awmin an zingah hian mipa vaibelchhe 8.97 an awm a. Hmeichhe voter hi vaibelchhe 8.73 vel an awm bawk a ni.

Inthlan thawh lina neihna te hi Andhra Pradesh ah seat 25, Telangana ah 17, Uttar Pradesh ah 13, Maharastra ah 11, Madhya Pradesh leh West Bengalah 8 ve ve, Bihar ah panga, Jharkhand leh Odisha ah pali leh Jammu and Kashmir ah seat 1 te an ni a.

Candidate langsar zingah Union Minister leh BJP hruaitu Giriraj Singh, Arjun Munda, G Kishan Reddy, Ajay Kumar Mishra, JDU hruaitu rajiv Ranjan Singh, Samajwadi hotupa Akhilesh Yadav, Congress hruaitu Adhir Ranjan Chowdhury, TMC atangin Mahua Moitra leh Shatrugan Sinha leh AIMIM hotupa Asaduddin Owaisi te an tel a ni.

<><><>

CBSE

Central Board of Secondary Education (CBSE) chuan vawiin khan pawl 10 leh pawl 12 board exam result a tihchhuahah mipa aiin hmeichhia in an ti tha zawk. CBSE thuchhuah danin pawl 12 ah hian zirlai exam zawng zawng atangin zaa 87.98 an pass a. Nikum aiin zaa 0.65 in a sang zawk a. Zirlai sing 2 leh sang li chuangin mark zaa 95 an hmu a ni.

Pawl 10 board exam ah zirlai pass zawng zawng hi zaa 93.60 a ni a. Hmeichhia zaa 94.75 an pass laiin mipa zaa 92.71 an pass a ni.

<><><>

ASSEMBLY ELECTION

Vawiin khan Andhra Pradesh leh Odisha Assembly inthlan vote thlak a ni a. Andhra Pradesh ah hian Assembly bial 175 ah inthlan buatsaih niin Odisha-ah hian inthlan thawhkhatnaah Assembly bial 28 ah inthlan buatsaih a ni bawk.

Hriat theih chinah tlai dar 3 thleng khan Andhra Pradesh ah vote zaa 55 a tla a, Odisha ah hian vote zaa 53 a tla bawk a ni.

Andhra Pradesh Assembly inthlanah hian candidate 2387 an awm a. Voter hi vaibelchhe 4 chuang an awm a ni.

<><><>